

Fwn oemq baenz geij ngoenz
Gwnz roen raeuzradrad
Civaiz yiengingatngat
Ngaenz baenz gaem haeuj fwngz

Ranz ngamq buemzsuemj, Augeiz doq angq dwk ngon fwen ngwngngwng doq yien vaiz rag ci okbae, duzvaiz gig dingq vah, mbouj yungh hat mbouj yungh fad couh gag byaij bae-ngoegnogoeg, aen civaiz ngi' ngi ngat-ngat bae riengz laeng caekhaex vaiz.

Caeuxcaeux couh miz vunz dwk dienhvah daeuj heuh de bae Mbanjnazgut daeh geij roengq gaeq ok rog goengloh bae. Geij ngoenz neix oemq fwn, gwnz roen myag dai myag lix, Nazgut Nazgyoiy song aen mbanj neix bouxlawz miz maz doenghyiengh yaek daeh haeuj daeh ok, cungj dwg okcienz cingj Augeiz bae bang daeh. Nyaenxlai bi daeuj gij vunz song aen mbanj neix gik ciengx vaiz, lau langh vaiz dwgrengz, gag Augeiz Mbanj-nazgyoiy ciengx miz duzvaiz dog. Yienghneix, baez doek fwn, Augeiz couh miz hong guh lai, miz baenz gaem ngaenz roengz daeh lo.

Augeiz bineix gaenq ndaej 60 bi, de caeuq Simjgeiz ciengx vaiz rag ci geijcib bi lo, daengx bi youq diuz roen gumzgumz gamxgamx doeng haeuj Mbanjnazgut Mbanjnazgyoiy neix baebae dauqdaug. Song aen mbanj caemh diuz roen namhnding neix doeng ok rog goengloh bae, mwh mbwn ndei soujfuz dohlahgih byaij ndaej, baez doek fwn couh dandan yawj aen civaiz Augeiz byaij ndaej. Geij bi gonq, Augeiz ndang lij cangq, yien vaiz rag ci baenz ngoenz mbouj youqgaenj, caiq gangj seizhaenx gyoengqvunz baebae dauqdaug hix mbouj miz geijlai doxgaiq au daeh haeujok. Hoeng gaenh song bi neix daeuj, Augeiz roxnynih bonjfaenh rengz doiq lai lo. Seizneix vunz lai miz cienz, ngoenznaengz ok haw cungj dwg baenz ci baenz ci doxgaiq dauqma, hawj Augeiz cungj nyaengq mbouj gib. Augeiz gvanbaz ngamq miz dahlwg dog, dahlwg gaenq maj baenz sau, mboengqneix cingq caeuq Daeggviq

Roen Haeuj Mbanj Yaek Bu Suijniz Lo

通屯道路要硬化了

□ Cingh Swmungz/清似蒙

Mbanjnazgut guhyoux. Augeiz couh baengh aen civaiz de laeuq lai di cienz ma bangzlaux.

Augeiz fwngz ndeu gaem cag yien vaiz, lohndin byaij youq gwnz roen myagsubsub, doq byaij doq detlet, saemxsaemx saxsax, dwgrengz dangq-maz. Yienznaeuz Augeiz laeuq ndaej cienz haemq lai, ndaej gwn haemq ndei, hoeng lij dwg byombyom nengjnengj, gaiq naeng suek gaqndok. Yienznaeuz “laux cix byom, rom ndaej fuk”, hoeng Augeiz cix mbouj nyienh hawj bonjfaenh laebdaeb byom roengzbae lo. Danghnaeuz caiq byom roengzbae dem couh mbouj baenz yiengh bouxvunz lo.

Augeiz laeh dangq civaiz ndeu dauqma, caen siengj yiet saek yaep. Hoeng ngamq naengh roengzdaeuj daengq lij caengz raeujremh, youh miz vunz daeuj heuh, youh yien vaiz okbae. Dauqma caengz ndaej aen roetgaeq he, youh miz vunz heuh, youh yien vaiz okbae……Geij ngoenz fwnmoenq neix ngoenz daengz haemh cungj mbouj ndaejhoengq saek seiz, Augeiz baeg dwk ndok yaek sanq.

Augeiz Simjgeiz seizneix song gvanbaz gag youq, dahlwg de Dahyungz deuz bae laeng Daeggviq. Dahyungz nem Daeggviq song boux gag doxrox gag guhyoux, Augeiz bonjlaiz siengj ra boux moiz ndeu bae cam Daeggviq au saek di cienzlaex, hoeng dah lwg cienh neix caeuq Daeggviq cix “caengz humx suen, sien ndaem byaek”, mbouj cingjlaeuj, hix mbouj baiq dangz, couh yienghneix haeuxsan cawj baenz ngaiz lo.

Seizneix, ban hauxseng cungj haengj yienghneix, Augeiz hix mbouj ndei caiq gangj gijmaz.

Aiq dwg geij ngoenz neix soemh fwn laeh vaiz rag ci dwgrengz gvaqbouh, Augeiz fatsa lo, cienq ywdoj gwn geij baez hix mbouj raen ndei, mbouj ndaej mbouj bae yangh veiswngghyen dajcim. Canghyw naeuz Augeiz ndang nyieg lai, yaek daj cimvenj geij ngoenz cij ndaej. Couh yienghneix Augeiz youq veiswnggh-yen dinghdingh venj geij ngoenz cim. Geij ngoenz mbouj ndaej bae laeh vaiz rag ci, Augeiz hozgenx dangqmaz.

Mboengqneix baihrog riuzcienz miz aen siusik ndeu: Cunhvej vuenh gaiq senjgij guh sat lo, boux cujyin moq couhdwg Daeggviq, “hak moq co hwnj nyaemh, cacaemj bang vunz lai”, de gietdingh bu roen suiyniz doeng haeuj Mbanjnazgut Mbanjnazgyoiy. Seizneix cingq dungyenz daengx-gyoengq vunzmbanj boux comz di ngaenz, gangj gijmaz “Yaek baenz-fouq, couh coih roen, mbanjmbanj hei qei doeng, goengdaek louz fanh-daih”. Lij ndaejnyi naeuz baihgwnz gaenq bued bit ngaenz guh gihcu j sezsih lajmbanj ndeu roengzdaeuj.

Ndaejnyi aen siusik neix, Augeiz lumj deng byajraez hwk dwk gwn mbouj van, ninz mbouj ndaek, ngamq haemh seizgan ndeu, binghcingz couh lumj dem naek haujlai. Daeggviq riu j geij gaen lwmak daeuj yawjngonz de, Augeiz ninz youq gwnz congzbingh, cengqgengz hai lwgda yawj Daeggviq mbat ndeu, naeuz: “Mwngz cingqcaen dajsuenq gvej goenq diuz roen laeuq

cienz gou bae?”
“Daxboh,” Daeggviq mbajdwd-dwd naeuz, “Seixneix daengxgyoengq vunzmbanj cungj maqmuengh bu roen suiyniz ha.”

Augeiz laepda mbouj guhsing.
“Daxboh, roen suiyniz itdingh au guh, aen seizdaih neix mbouj guh mbouj baenz, caux mbanjmoq sevei-cujyi mbouj guh mbouj baenz. Couh-cinj gou seizneix mbouj heuh guh, roengzbae hix miz vunz heuh guh, gou seizneix wngdang vih gyoengq vunz-mbanj guh di saedsaeh ha. Mbouj bu suiyniz vunz song aen mbanj neix daeh huq haeujok mbouj fuengbienh. Seizneix vunz mbanj monzloh lai lo, dajndaem dajciengx gijmaz cungj guh baenz gvei hmoz hung, gihcu j sezsih mbouj guh ndei mbouj baenz ha.” Daeggviq naeuz.

“Mwngz deuz vaiq di, gou mbouj dwg boh mwngz……” Augeiz hei q-hwnj lo.

Dahyungz bae yawj Augeiz, Augeiz hix mbouj swt de.

Baezneix haeuj yi hyen, Augeiz yungh bae haujlai cienz, sim'in raixcaix. Mwh gietsuenq, yi hyen daengq de au dawz ndei mbawfei gyau ngaenz, naeuz ndaej dawz bae gizbanhsaeh sinhnungzhoz ndaw yangh ndaej lingx dingz lai cienzyw boiz dauq hawj de. Augeiz dauqma le cam Simjgeiz cij rox, laxlawz Daeggviq caeux couh bang song boux laux de banhleix camgya sinhhingz nungzcu nh hozcoz yihliuz lo. Simjgeiz lij dawz bonj bouhnding iq ndeu daeuj hawj Augeiz, naeuz neix dwg yangh giswngghsoj fat hawj, ndaej bae lingx au gij ngaenz bangcoengh gwndaenj ranz giva senglw g.

Bi daihngleih haicin, diuzroen doeng haeuj Mbanjnazgut Mbanj-nazgyoiy haenx hai hong coih bingz yaek bwh bu suiyniz lo. Augeiz naeuz coenz hawj Daeggviq, heuh de dauqma bang yien duzvaiz caeuq aen civaiz bae gai, ndaej cienz gien bae coih roen.

Geij ngoenz neix mbwn gvengq, gig ndei guh hong coih roen.

Gyaez Caeuq Miz Mbei

爱 和 勇 气

Geij bi gonq, gou youq yi hyen guh bouxgagnyienh, seizhaenx roxnaj boux lwgmbwk ndeu. De bingh ndaej gig naek, caemhcai q bingh de noix raen dangqmaz, gij gihvei dog gouq de couhdwg hawj daegnuengx de caeucoq lwed hawj de. Aenvih daegnuengx de ndaej bingh neix gvaq, hoeng doeklaeng gig geizheih dwk lix roengzdaeuj, seizneix ndaw ndang daegnuengx de miz gij gangdij ndaej doxdingj gij binghdoeg aen bingh neix.

Canghyw naeuz aen cingzgvang neix hawj boux daeglw g neix, cam de nyienh mbouj nyienh caeucoq lwed hawj beix de. Gou raen de cijdwg lawq yaep he, couh dap naeuz: “Danghnaeuz ndaej gouq beix gou, gou haengj!”

Cingq caeucoq lwed seiz, de laegcaem dwk ninz youq henz ndang

beix de, raen beix de gemj fukdaug hoengzmaeq, de riu lo.

Hoeng, de sawqmwh mbouj riu lo, saeknaj bieghau dwk yawj canghyw, sing saenzdedded dwk cam: “Gou rox doq dai bae lwi?”

Yenzlaiz de lij iq, geijloeng gij ei qsei canghyw, nyinhnaeuz yaek caeucoq lwed daengx ndang hawj beix de, yungh mingh sw hgeij bae gouq mingh beix de. Lwgnyez miz saek seiz gij yawj fap yawj vw ndiz gig hozoiq, hingzveiz gyoengqde guh ok dou hix mbouj lijgaij, hoeng gij gietdingh neix ciengzseiz dwg gyoengqde youq ndawsim naemjngeix cien bak baez cij guh ok. Hix cingqngamj aenvih baenzneix hozoiq, cij yienjok dijbauj gij gietdingh gyoengqde guh ok.

Boux daeglw g neix hawj gou hagrox maz dwg gyaez, maz dwg miz mbei.



Gij ranzcanx Lungzswng Guengjsae.